

Herbæ acaules aut rarius caulescentes, uni- aut rarius plurifloræ. Folia dentata, runcinata aut pinnatifida. Flores flavi aut aurantiaci.

1. APARGIA CHILLENSIS. †

A. caule erecto, ramoso foliisque glabris, radicalibus runcinato-pinnatifidis; involucri piloso-hispido.

*Crescit in Regno Quitensi prope pagum Chillo, alt. 1430 hex. ☿ Floret Martio.*

RADIX perennis, fusiformis. CAULIS erectus, sesqui- aut bipedalis, ramosus, foliatus, sulcatus, glaber, lactescens; ramis alternis, patulis; ramulis unifloris. FOLIA glabra, sessilia, radicalia sinuato-pinnatifida, laciniis oblongis acutiusculis, quadripollicaria; caulina inferiora pinnatifida, bipollicaria, laciniis anguste linearibus, terminali reliquis longiore, superiora integra, anguste linearia. FLORES terminales, solitarii, pedunculati; pedunculis sublanatis, bracteatis; bracteis capillaceis. INVOLUCRUM oblongum, urceolatum, polyphyllum; foliolis circiter 50, linearibus, obtusiusculis, membranaceis, externe piloso-hispidis, exterioribus brevioribus. RECEPTACULUM nudum, concavum. FLOSCULI crebri, involucri superantes, omnes ligulati. COROLLA flava, glabra; tubo capillaceo; ligula lineari, plana, apice obtuse quinque-dentata, longitudine tubi. ANTHERÆ exsertæ. OVARIVM lineare, superne attenuatum. STYLUS exsertus, glaber. STIGMATIS laciniæ patentes. AKENIVM immaturum. PAPPUS sessilis; pilis plumosis, albidis, patulis.

An certe hujus generis? Fructuum structura ignota.

HIERACIUM. LINN.

INVOLUCRUM polyphyllum, imbricatum. RECEPTACULUM nudum. PAPPUS pilosus, sessilis.

Herbæ (fere omnes perennes) acaules unifloræ, aut sæpius caulescentes multifloræ, rarissime frutices. Folia dentata, runcinata aut pinnatifida, rarius integerrima. Flores sæpius flavi, interdum aurantiaci, purpurei aut albidi.

1. HIERACIUM AVILÆ. †

H. caule erecto, simplici, ferrugineo-hirsutissimo; foliis lanceolatis, remote dentatis, hirsutis, subtus canescentibus; panicula terminali, ramosa; rhachi subflexuosa; involucri glabro.

*Crescit in devexis montis Avilæ, vulgo Silla de Caracas dicti, alt. 800 hex. ☿ Floret Septembri.*

CAULIS erectus, sesquipedalis, simplex, ferrugineo-hirsutissimus. FOLIA caulina subsessilia, lanceolata, grosse dentata, basi angustata, hirsuta, subtus canescentia. PANICULA terminalis, ramosa, subquadripollicaris; ramis sparsis, patentibus rhachique subflexuosa pubescenti-hispidis. FLORES pedicellati, magnitudine Chondrillæ junceæ. INVOLUCRUM oblongo-cylindraceum, polyphyllum; foliolis circiter 17,